

La duana svizra ed il Corp da guardias da cunfin en il temp da la globalisaziun

Il pli impurtant en furma concisa

Cun la fundaziun dal spazi europeic da Schengen è vegnidas abolidas las controllas sistematicas da personas als cunfins interns dals stadis commembers. A medem temp èn las activitads da controlla e da surveglianza vegnidas intensivadas als cunfins externs. La Svizra è dapi l'onn 2008 commembra da la Cunvegna da Schengen da l'Uniun europeica. En Svizra èn las controllas da duana e da martganzia dentant restadas. Cun Schengen è vegnida intensivada la collavuraziun da la duana svizra cun las organisaziuns partenarias internas ed estras, er en activitads transcunfinalas. Ultra dal Corp da guardias da cunfin mettan er experts da duana svizzers a disposiziun lur savida per missiuns internaziunalas da pasch, da segirezza e d'economia.



Schweizerische Eidgenossenschaft
Confédération suisse
Confederazione Svizzera
Confederaziun svizra

Departament federal da finanzas DFF

Ina meglra collavuraziun als cunfins externs

Tras la Cunvegna da Schengen è vegnidas abolidas las controllas sistematicas da personas tranter ils stadis commembers. Percunter èn las controllas als cunfins externs dal spazi da Schengen vegnidas intensivadas e la collavuraziun transcunfinala tranter la polizia e la giustia è vegnida rinforzada. Per la controlla e per la surveglianza dals cunfins externs èn responsabels ils stadis commembers ch'èn dentant liads a prescripziuns communablas.

L'Agentura europeica per la cooperaziun operativa als cunfins externs, Frontex, gida a realisar las prescripziuns e coordinescha la collavuraziun operativa als cunfins externs. Ils stadis commembers da la Cunvegna da Schengen pon er dumandar sustegn operativ tras Frontex.

L'agentura cun sedia a Varsovia ha cumenzà sias activitads l'onn 2005. Ella fa analisas da ristgas e perscrutaziuns tecnologicas davart la protecziun dals cunfins. L'agentura sustegna ils stadis commembers en connex cun controllas da las entradas en in pajais e cun sancziuns da repatriament. Tar operaziuns communablas examineschan ils organs naziunals da la controlla dals cunfins er standards per intervenziuns, uschenumnadas «best practices».

Il Corp da guardias da cunfin svizzer als cunfins externs da Schengen

Ils puncts d'intervenziun centrals en il rom da Frontex èn per il mument ils cunfins maritims en il territori da la Mar mediterranea tant sco ils cunfins al ost e sidost dal pajais. Per proteger ils cunfins en l'aria vegnan definidas tenor basegn prioritads localas u regiunalas. Las guardias da cunfins svizzas sa participeschan dapi la fin da l'onn 2011 er ad operaziuns per la protecziun dals cunfins externs da l'UE. Il Corp da guardias da cunfin svizzer (Cgcf), la part unifurmada ed armada da l'Administraziun federala da duana (AFD), dispona da 40 guardias da cunfin ch'èn scoladas spezialmain per talas acziuns. L'onn 2011 è il Corp da guardias da cunfin svizzer sa participà ad operaziuns da Frontex cun 24 mandats e 803 dis da ser-

vetsch. Ils territoris principals da las operaziuns èn stads l'Italia, la Grecia, la Bulgaria, la Slovenia e la Spagna. Il Corp da guardias da cunfin ha mess a disposiziun a l'agentura surtut spezialists per documents e vehichels ed er manaders da chauns. Frontex ha dà access a la Svizra ad infurmaziuns davart ils moviments da migraziun e davart activitads da cuntra-banda cun persunas.

Intervenziuns a l'exteriur per la pasch e la segirezza

Intervenziuns a l'exteriur han ina lunga tradiziun tar l'Administraziun federala da duana (AFD). Ellas han lieu en il rom da la politica svizra da l'exteriur, da commerzi, da pasch e da segirezza. En total èn vegnids tramess – sper ils mandats per Frontex – var 20 collavuraturs da l'AFD sin missiuns internaziunalas en las domenas suandantas:

- Promozioni da la pasch tramettend per incumbensa dal Departament federal d'affars exteriurs collavuraturs da l'AFD per sustegnair organisaziuns multilateralas. Lur incumbensa è da sustegnair autoritads da duana localas surtut en pajais dal Balcan per constituir structuras dal stadi da dretg e per scolar personal.
- Collavuraziun tecnica en il rom da projects d'assistenza per incumbensa dal Secretariat da stadi per l'economia sco instrument per promover il commerzi en pajais da svilup. Cun quests projects duai vegnir meglierada l'effizienz da las autoritads da duana per pudair facilitar il stgomi da martganzia en il commerzi globalisà. L'onn 2011 ha l'AFD sustegnì la Tunesia ed il Maroc per modernisar las structuras da scolaiziun da lur autoritads da duana.
- Cooperaziun da transiziun cun ils stadis da l'Europa orientala per incumbensa da la Direcziun da svilup e da collavuraziun en il rom da programs da cooperaziun.
- Sustegn personal cun spezialists per organisaziuns internaziunalas sco l'UE, l'Organisaziun mundiala da duana, l'Organisaziun mundiala da commerzi (OMC), l'Organisaziun per la segirezza e la collavuraziun en l'Europa (OSCE) e l'Associaziun europeica da commerzi liber (AECL).